

Danskít atornerluisunut katsorsaannermut ilinniarfiutai pioreersut suleqatigalugit atornerluisunut katsorsaasutut ilinniarneq kalaallisut ingerlanneqartalernissaa pillugu apeq-quteqaat aallaavigalugu oqallinnissamik siunnersuut.

(Inatsisartunut ilaasortaq Astrid Fleischer Rex, Demokraatit)

Akissuteqaat

(Peqqissutsimut Naalakkersuisoq, Agathe Fountain)

Apeqquteqaat aallaavigalugu oqallinnissamik siunnersuummut Naalakkersuisut aallaqqaammut qujaqqaarusupput, tassa matumani pineqartoq ullutsinni soqutiginaateqarlunilu pingaaruteqarluinnarmat.

Imigassamik, ikiaroorartunik aningaasanoorutinillu atornerluisuunerit unammilligassaanerujussuat Naalakkersuisunit eqqumaffigilluarneqarpoq, atornerluinerimmi pilersitaannik ajornartorsiutit sutigut tamatigut inuiaqatigiinnut sunniisarput. Taamaattumik Naalakkersuisut kissaatigaat ataatsimoorullugu unammilligassat qaangerniarlugit sulissutiginiarnerini sullissivinni tamani iliuuseqartoqarnissaa.

2005-imi pisortat suliffiutaasa aaqqissuunneqarnerisa ilusaat pillugu Aaqqissuussaannermut Ataatsimiititaliap eqqarsaatersuummini kaammattuutigaa imigassamik atornerluisunik katsorsaasarneq tassungalu aningaasaliissutit kommuninut nuunneqassasut. Kaammattuut taanna suli piviusunngunngilaq, Naalakkersuisulli nuussinissaq suli kissaatigimmassuk Peqqissutsimut Naalakkersuisoqarfiup kommunillu akornanni ulluni makkunani qanittumik siunertaqarluartumillu oqaloqatigiittoqarpoq, imigassamik atornerluisunik katsorsaasarnerup tamarmi-usup ilaannaataluunniit nuunnissaanut ataatsimut tunngavissiiinissaq siunertaralugu.

Pineqartup tamakkiisumik misissorluarneqarnissaa nalunaarsorneqarnissaalu pillugit susasaqartut akonanni annertuumik isumaqatigiittoqarpoq, kiisalu imigassamik atornerluisunik katsorsaasarneq kisiat aallunneqassanngitsoq, aammali atornerluiffiit tamaasa sulinermi ilanngunneqassasut, taamaaliornikkut siunissami katsorsartinnissamut neqeroorutit makkuninnga tunngavissinniarlugit:

- Atornerluisunut katsorsartinnissamut neqeroorutit maanna piusut qulaajarneqarnissaat ilisimasaqarfiginerilu
- Atornerluisunut katsorsartinnissamut neqeroorutit maanna piusut nalilerneqarneri
- Atornerluisuunerit maanna atuuttut qanoq isikkoqarnerisa nunalu immikkoortukkuutaarlugu qanoq atugaatiginerisa qulaajarnissaat
- Katsorsaasarnerit pisariaqartinneqarnerisa qulaajarneqarnissaat, tamatuma ataani katsorsaariaatsinik assigiinngitsunik amerlanernik pisariaqartitsisoqarnerisooq

- Inunnut atornerluinerminnut katsorsartereersimasunut taakkulu qanigisaannut katsorsartinnermik nangitseqqiisarnermik pisariaqartitsineq kiisalu tamatumunnga piumasaaqaatit
- Atornerluisunik katsorsaasartunik ilinniartitsinissamut periarfissat pisariaqartinnerisalu qulaajarneri kiisalu ilinniartitaanermut piumasaaqaatit
- Nuna tamakkerlugu ilisimasat ineriartortinneqarnissaasa pitsaassusaasalu qularnaarneqartarnissaat atornerluisunillu katsorsaasarnerup pitsaassusaata qulakkeerneqarnissaa.

Ilinniartitaanerup qulaajarneqarnissaanut sulinermi isumaliutit makku ilaatinneqarput: ilinniartitsinissamik pisariaqartitsineq, atornerluisuunerit maanna isikkuinut naleqqiullugit katsorsaasut piginnaasaannut piumasaaqaatit, ilinniartitaanerup isikkua, ilinniarfinnik pioreersunik suleqateqarsinnaaneq, ilinniarnert pioreersut nunatsinni pissutsinut, pisariaqartitanut, ilinnialernermi piumasaaqatinut il.il. naleqqussarnissaasa periarfissinneqarsinnaanerit.

Atornerluisuunik katsorsaasartunut siunissami ilinniartitaanissaq ilusilerniarneqalerpat katsorsaanerillu iluatsilluassappata oqaatsit ilitsoqqussat atorlugit ingerlanneqartarnissaat pingaaruteqarpoq. Atornerluisut atornerluisuunerminnik sapinngisamik amerlasuut qaangiisarnissaat anguniarlugu nunatsinni katsorsaasalertussat ilinniartinneqartussat suliaminnut pikkorisuunissaat anguniakkat pingaarnersaraat.

Taamaasillunga pineqartup angusaqarfiulluartumik oqallisigineqarnissaa kissaatigalugu Inatsisartunut ingerlateqqippara.